



## Utjecaj primljenog ibadeta na nutrinu i ponašanje (Medina)

Hatib: dr. Abdullah ibn Abdurrahman el-Buajdžan

9. ševval 1442. po Hidžri / 21. maj 2021.

Hvala Allahu, Onome Koji upućuje koga hoće na Pravi put, i upućuje koga hoće u pokornost Njemu, i Koji prima od bogobojaznih njihova djela i obasipa ih Svojim zadovoljstvom. Hvalimo Ga, On je dostojan svake pohvale, hvale, blagodati, dobrote, darežljivosti i plemenitosti. Hvalimo Ga, On nam je dovoljan, kod Njega tražimo utočište od svakog iskušenja i nevolje, i od svake brige tuge i bola. Hvalimo Ga, od Njega pomoć i oprost tražimo, vjerujemo u Njega i uzdamo se u Njega, Njemu se utječemo od zla naših duša i naših loših djela. Koga Allah uputi, niko ga u zabludu ne može odvesti, a koga On u zabludi ostavi, niko ga ne može uputiti. Svjedočim da nema boga osim Allaha, Jedinog, Koji druga nema, i svjedočim da je Muhammed, sallallahu alejhi ve sellem, Njegov rob i poslanik, odabranik među Njegovim stvorenjima i Njegov prijatelj. Dostavio je poslanicu, ispunio emanet, savjetovao ummet i borio se na Allahovom putu onako kako se treba boriti sve dok mu nije došla smrt, neka su na njega Allahova milost, blagoslov i mir, i na njegovu porodicu i ashabe i sve one koji pozivaju onako kako je on pozivao do Sudnjeg dana. Najbolji govor je Allahov govor, a najbolja uputa je uputa Allahovog Poslanika, sallallahu alejhi ve sellem. Najgore stvari u vjeri su nove stvari, svaka novotarija je zabluda, a svaka zabluda vodi u Vatru.

O vjernici, oporučujem sebi i vama bogobojaznost, ona je Allahova oporuka prvim i potonjim: "Mi smo onima kojima je data Knjiga prije vas, a i vama, već zapovjedili da se bojite Allaha." (En-Nisa, 131)

O muslimani, prije samo nekoliko dana ispratili smo mjesec ramazan. Nadamo se da smo kod Allaha upisani među one čija su djela primljena i koji su se spasili, i molimo





Ga da učvrsti naša srca i stopala na Pravom putu, i da nas pomogne u pokornosti Njemu, i učini nas od onih koji su postigli Njegovo zadovoljstvo. Prošao je mjesec ramazan, period blagoslova, dobrote, dobra i dobročinstva. Prošli su njegovi dani, i zaključena su njegova djela. Uspio je ko je uspio, a uskraćen je onaj ko je uskraćen. Da nam je znati čija su djela primljena kod Allaha, pa da mu čestitamo, i čija su djela odbijena, pa da ga sažalijevamo.

O ljudi, obnovite svoj zavjet sa Allahom, u svakom vremenu, i ne prekidajte vezu sa Allahom nakon ramazana. On je blizu i uslišava molbe onih koji Ga mole i ispunjava potrebe. Njegove riznice su nepresušne, i Njegove ruke su ispružene: “Njemu se mole oni koji su na nebesima i na Zemlji; svakog časa On se zanima nečim” (Er-Rahman, 29); “Allah je - nema boga osim Njega – Živi i Vječni! Ne obuzima Ga ni drijemež ni san!”

O muslimani, ibadet pozitivno utječe na ponašanje onoga ko ga čini. Naprimjer, namaz odvraća klanjača od razvrata i loših djela. Jedan od znakova primanja djela kod Allaha jeste promjena nabolje. Kako je samo lijepo, nakon lošeg djela, učiniti dobro djelo koje će pobrisati loše, a još ljepše je, nakon dobrog djela, učiniti drugo dobro djelo i tako ustrajati u činjenju dobrih djela. Molite Allaha da vam podari čvrstinu u pokornosti do smrti, i utječite se Njemu od prevrtljivosti srca, i od pada nakon uspona. Allahu moj, Ti koji okrećeš srca, učvrsti naša srca u Tvojoj vjeri. Allahu moj, Ti koji usmjeravaš srca, usmjeri naša srca ka pokornosti Tebi.

Poštovani vjernici, molite Allaha da vas učvrsti u pokornosti Njemu. U vjerodostojnoj predaji navodi se da je Allahov Poslanik, sallallahu alejhi ve sellem, rekao: “Doista će jedan od vas činiti djela stanovnika Dženneta sve dok između njega i Dženneeta ne bude koliko je lakat, pa će ga preteći Knjiga sudbine, i početak će raditi djela stanovnika Vatre, pa će i ući u nju. Doista će jedan od vas činiti djela stanovnika Vatre sve dok između njega i Vatre ne bude koliko je lakat, pa će ga preteći knjiga i početak će raditi djela stanovnika Dženneta, pa će i ući u njega.” (Muttefekun alejhi)





O vjernici, čuvajte se upropaštavanja djela, činite sve da ona budu primljena i klonite se uzroka gubitka nagrade. Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: “Znate li ko je muflis – bankrot?” Ashabi odgovoriše: “Muflis je onaj koji nema novca ni imetka”, a Allahov Poslanik, sallallahu alejhi ve sellem, reče: “Zaista je pravi bankrot (propalica) iz moga ummeta onaj ko dođe na Sudnji dan sa namazom, postom, zekatom, a na dunjaluku je ovoga uvrijedio, onoga potvorio, ovoga zakinuo, onoga udario ili ubio, pa će se svakom od njih dati od njegovih dobrih djela, a ako nestane njegovih dobrih djela, prije nego što namiri ono što je dužan ljudima, onda će se uzeti od njihovih grijeha, pa će se njemu natovariti i bit će bačen u džehennemsku vatru.” (Muslim)

Sevban, radijallahu anhu, prenosi da je Allahov Poslanik, sallallahu alejhi ve sellem, rekao: “Sigurno znam ljude iz moga ummeta koji će doći na Sudnji dan sa dobrim djelima poput bijelih brda Tihame, pa će ih Allah, džellešanuhu, u prah pretvoriti i raspršiti.” Sevban, radijallahu anhu, rekao je: “Allahov Poslaniče, opiši nam ih i pojasni nam da ne budemo od njih, a mi to ne znamo.” Poslanik, sallallahu alejhi ve sellem, reče: “Oni su vaša braća, od vašeg roda. Klanjaju noću ko što i vi klanjate, ali su oni ljudi koji, kada se osame, krše Allahove zabrane.” (Ibn Madža)

O muslimani, puteva za činjenje dobra je mnogo, ali gdje su oni koji bi tim putevima išli? Vrata dobra su otvorena, ali gdje su oni koji će na ta vrata ući? Istina je jasna, i zastraniti od nje može samo onaj ko sebi propast želi. O vjernici, uzmite udjela u svakom dobrom i pobožnom djelu. “O vjernici, molitvu obavljajte i Gospodaru svome se klanjajte, i dobra djela činite da biste postigli ono što želite.” (El-Hadždž, 77) Strpljivost u ustrajnosti i čvrstini jedno je od najboljih djela koja približavaju Allahu, jer su čvrstina i ustrajnost dokaz iskrenosti i primanja djela kod Allaha. Allahu su najdraža ona djela koja traju, a Poslanikova djela upravo su bila takva. Budite čvrsti u pokornosti i ustrajni u dobočinstvu i dobrom djelu.

Poštovani vjernici, svi mjeseci su odabrano vrijeme za činjenje ibadeta, iako se razlikuju u vrijednosti. Čitav život je prilika za dobro djelo i pokornost Allahu. Svakome je olakšano ono zbog čega je stvoren. Svi ljudi rano izlaze iz svojih kuća, i





prodaju svoje duše, pa ih oslobode ili ih upropaste. O muslimani, drage volje Allahu zajam dajte i pripremiti za svoje duše ono što će im koristiti na budućem svijetu. Uzvišeni kaže: “A dobro koje za sebe unaprijed osigurate naći ćete kod Allaha još većim i dobit ćete još veću nagradu.” (El-Muzzemmil, 20)

“Ko je taj koji će Allahu drage volje zajam dati, pa da mu ga On mnogostruko vrati?” (El-Bekara, 245)

Znajte da je post štit, i da čovjeku pripada svako njegovo djelo, osim posta, on pripada Allahu i On za njega posebno nagrađuje. Ko od vas može da isposti šest dana ševvala, neka to učini, jer je post ovih dana sunnet i praksa Poslanika, sallallahu alejhi ve sellem. Ebu Ejjub el-Ensari, radijallahu anhu, prenosi da je Allahov Poslanik, sallallahu alejhi ve sellem, rekao: “Ko isposti ramazan i šest dana ševvala poslije njega, kao da je postio cijelu godinu.” (Muslim) Allah, džellešanuhu, jedno dobro djelo vrednuje kao deset dobrih djela, pa tako post jednog mjeseca vrijedi kao post deset mjeseci (300 dana), a post šest dana kao post dva mjeseca, i to je cijela godina. Nemojte biti sebični prema sebi, tako što ćete propustiti ovih šest dana, jer možda kod Allaha budete upisani kao onaj ko je postio cijelo vrijeme, tj. cijelu godinu, a to je velika i neprocjenjiva dobit, koja zahtijeva od nas veliku želju, trud i ozbiljnost. Dozvoljeno ih je postiti spojeno ili rastavljeno. O vjernici, Allahove blagodati prema nama ne mogu se izbrojati i Njegovo dobro nema kraja i nije ograničeno računom i brojem, i šta god uradili, ne možemo se odužiti za samo jednu blagodat. “... i ako biste Allahove blagodati brojali, ne biste ih nabrojali.” (Ibrahim, 34) Zahvaljujte Allahu na Njegovim darovima i blagodatima, i koristite ih u pokornosti Njemu i ibadetu. Kada bi čovjek sve vrijeme od rođenja do smrti proveo na sedždi tražeći Allahovo zadovoljstvo, ne bi se odužio za samo jednu od Allahovih blagodati. (Ahmed)

Poštovani vjernici, niko neće ući u Džennet samo zbog svojih djela, nego prije svega Allahovom dobrotom i milošću, kao što se prenosi od Ebu Hurejre, radijallahu anhu, da je Allahov Poslanik, sallallahu alejhi ve sellem, rekao: “Nikoga od vas neće spasiti njegovo djelo.” Neki čovjek je upitao: “Pa čak ni tebe, Allahov Poslaniče?” “Pa čak





ni mene, osim ako me Allah obaspe Svojom milošću”, reče Poslanik, sallallahu alejhi ve sellem. (Muslim) Neka nikoga ne obmanu njegova djela, neka ne prigovara zbog svojih ibadeta, neka ne uveličava ono što je uradio i neka ne posustane u pokornosti Allahu, jer ne zna hoće li biti lijepo primljen kod Allaha i ne zna kakav će biti njegov kraj. Bojte se Allaha koliko god možete, čvrsto se držite svoje vjere, prihvatite se sunneta svog Vjerovjesnika, popravite svoje međusobne odnose, čuvajte svoje jedinstvo i svoju domovinu, budite jedna ruka protiv vašeg neprijatelja i molite Allaha da vas učvrsti i uputi.

Zatim, znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!” (El-Ahzab, 56)

Allah podario blagoslov meni i vama u časnom Kur’anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

